

## SCHNUPFNASE + SCHNUPFNÄSLI, 2023

Näslì: Wie machsch du daas ägetligg mit em Loon?  
S hed jo alles uufgschlaage, nit numme dr Stroom.

Nase: Jo syt s „Cheminée-Holz“ au so düür worden isch,  
verholz ii jeedi Wuchen en nöie Ikea-Disch.

Nase: Dä „Bike-Trail“, miir isch s zwoor nit loogisch,  
syyg schyynts komplett ökoloogisch.

Näslì: Jo wenn döört im Frielig e Frosch üüberfaarsch,  
isch die ganzi Biodiversität am Aarsch.

Näslì: Im Wald grilliere, isch jeede Summer verbotte,  
s Erschtauguscht-Füürwärgg duet bi miir langsam verrotte.

Nase: Nimm s nit soo traagisch, bim Füürwärgg isch s jo soo,  
die groosse Chracher chaasch immer no bi dr Bangg abloo.

Nase: Die Automaate-Gnagger, wo die Bomben au baue,  
worum chönne die ägetligg immer abhaue?

Näslì: Dr Hauptgrund isch äifach – hools dr Gugger,  
dr Glyych wie im Wallis, döört säit men em Tschugger.

Näslì: Hüt sinn alli für d Umwält, Groossi und Chlyyni,  
wettsch nit au in d Partei vo däm Agostini?

Nase: Wäisch die Griene schmegge soo koomisch, no alte Däsche,  
daas chunnt drvoo, wenn sy numme bi zwanzig Graad wäsche.

Nase: Wäg de Stüüre, han ii ghöört, däät s sich s loone,  
wenn me z Pfäffigen oobe wurdi woone.

Näslì: Numme döört leersch e Huffe koomischi Lüt kenne,  
die häi e Wienachtsbelüüchtig, wo jo gaar nit duet brenne.

Näslì: Apropos, d Pfäffiger häi vo Blaanig käi blasse Schimmer,  
s nöy Schuelhuus hed scho wiider z weenig Zimmer.

Nase: Wäisch, s Schuelhuus wär ägetligg gaar nit z chlyy,  
dasch numme will döört d Hälfti scho d Leerer syy.

Nase: Z Basel hed s nit numme im Zolli Affe,  
die wänn tatsächlich Frau und Maa appschaffe.

Näslì: S isch alles klaar, drum wüsse die Pflutte,  
au gaar nümm richtig, wie me duet schutte.

Näslì: App's, Twitter, „Face-Book“, alles quäält,  
dä digitaali Doorffblatz hed jetz grad no gfäält.

Nase: Denn seggle d Lüt zum Psychiater und füüle sich schlabb.  
bis sii meergge, dä hed no dr gröösser Eggen ap.

Nase: Dr Infantino findet sich bsunders kuul,  
wenn er vo hüt uff moorn verzellt är syg schwuul.

Näslì: Und dr Bundesroot will s dritte Gschlächt nit erwääne,  
drbyy mäint me, s gääb jo numme no vo dääne.

Näslì: Bi de hüttige Bryyse, wird iich zum aarme Maa,  
drum lach iich miir jetz definitiv Äini aa.

Nase: Hüt bruuchsch käi Schööni, s längt Äini vo Buus,  
Hauptsach, si hed e Huffe Holz vor em Huus.